

## SACRI TRIDUI DI PASCHE

**Pasche e significhe Passaç.** Pai nestris vielonons il passaç di un grant flum cence i puints, pai nestris nonos il passaç de tragedie di dôs vueris a zornadis di pâs, de sclavitût de emigrazion a un lavôr dongje cjase, de seconde elementâr a un diplome, e vuê, par milions di profugos, de vite di infier a une dignitat di vite e par nô: de sclavitût dai idui e dai mîts de moderniat a la vite di fede te peraule di Crist.

Cheste e je la Pasche: il “passaç” li che ogni volte al interven Diu a dânum une man.

Passaç come ai temps di Mosè tal Esodo dal Egjît (prime leture); passaç come ai temps di Gjesù che midiant de sô muart e resurezion dai muarts nus delibere dal spasim mortâl che o puartin ducj dentri: lis tenebris di une vite cence significât, di pecjât o falide e il vueit tragic de muart.

In cheste curnîs o vin di meti la Pasche, o miôr il sacri Tridui pascâl di chest an; te curnîs di un grant passaç. Te storie dal mont o stin vivint un trapas di epoche: chel de ete moderne al postmoderni; lis etniis che a vivin in Friûl a son clamadis a cjapâ une cussience responsabile de proprie identitat; te glesie, pape Francesc al cjale lontan. Ma forzit par ognun di nô, il passaç al è prime di dut dentri di me tal tornâ a cjatâ la mê persone pierdude o fruçonade: il passaç te fede, che e done gracie di Diu e vòi gnûfs par ri-viodi dut te lûs dal Signôr muart e resurit. Lui al è la nestre vere Pasche che ilumine cronache, storie e nestre vite di vuê.

Il sacri Tridui al comprent Joibe-Vinars sant, Sabide sante e la vegle di Pasche inte grande gnot.

La glesie e cîr di fânus vivi chescj moments midiant des azions liturgjichis. Il messalin justamentri nus ripuarte tantis rubrichis sore dut tal Vinaris e Sabide sante, ma al di là di ce che nus jude a preparâsi a la ritualitat di chestis zornadis, l'impuartant al è che o rivin a vivi noaltris tal spirt e te empatie lis leturis, i gjescj, lis preieris proponudis.

Joibe sante: la memorie de cene dal Signôr cu la lavande dai pîts e il misteri de Eucaristie.  
Vinars sant: l'amôr dal Fi di Diu par nô, la sô passion e muart tal suplizi de crôs.

Sabide sante: Zornade dal silenzi: Crist al sprofonde tes inferis par salvâ in chel altri mont chei che in chest mont no ju veve cjatâts.

Vegle di Pasche: la realitat-misteri de risurezion di Crist e cun lui midiant de fede e dal batisim la risurezion de nestre vite a une vite gnove, cence i idui dal mont, te lus di Crist risurit.

Tal auguri di un bon Tridui di Pasche e di une Pasche serene e di pâs.

### JOIBE SANTE «in Cena Domini» Jutoris pe Liturgjie

13 di Avrîl

Al comence il sacri Tridui e la antifone di jentrade nus da l'intono par svicinâsi cun grant rispiet e venerazion a lis azions liturgjichis di cheste sere.

**Antifone di jentrade**

cf. Ga 6,14

Che no nus capiti mai di vantâsi di alc  
che no sedi la crôs di nestri Signôr Gjesù Crist,  
lui al è la salvece, la vite e la resurezion;  
midiant di lui o sin stâts salvâts e liberâts.  
**Si dîs Glorie a Diu.**

## Colete

Diu, che tu nus âs dâts dongje par fâ memorie  
de Cene une vore sante cuant che to Fi, prin di consegnâsi a la muart,  
al à volût lassâi a la Glesie il gnûf sacrifici de aleance eterne  
e il past nuviçâl dal so bonvolê,  
fâs, ti prein, che di un misteri cussì grant  
o podin urî la plenece de caritât e de vite.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

## PRIME LETURE

Es 12,1-8.11-14

### Prescrizioni per cene de Pasche.

*Il rît antighissim che nus ven presentât, al ricuarde la Pasche dal Signôr a favôr dai Ebreus sclâfs dal faraon (1250 p.d.C.). Dut al cjape un sigil tal sanc dal agnel sacrificât cuant che o fasarai sentence di ducj i dius dal Egjit, jo, il Signôr. Il sanc al sarà par vualtris un segnâl su lis cjasis là ch'o sêis a stâ. Viodint chest segnâl, jo o passarai dret.*

*E je l'inizi de liberazion, marce viers la libertât di un popul che, o parons o sclâfs, si stente tant a fâ se e coste cussientizazion, disponibilitât, union, sacrifici.*

*Il cristian in cheste Joibe sante al pense al propri popul, ma ancje al sanc che Crist al à spandût par deliberânus dai nestris idui personâi che nus rindin sclâfs di ogni sorte di egoism.*

## Dal libri dal Esodo

Il Signôr i disè a Mosè e a Aron in Egjit: «Chest mês al sarà par vualtris il prin di ducj i mês dal an. Feveliur a dute la int di Israel e disiur cussì: Ai dîs di chest mês, ognidun che si proviodi un cjâf di besteam minût par famee, un cjâf di besteam minût par cjase. Se la famee e je masse piçule par un nemâl dal trop, si metarà cun chel ch'al è a stâ plui dongje, seont il numar des bocjis. O sielzarêis un nemâl dal trop daûr che ognidun al pues mangjânt. Il nemâl dal trop al sarà un masejo, cence nissune pecje, di un an. Lu sielzarêis framieç dai rocs o des cjavris. O vês di tignîlu fint ai cutuardis di chest mês, e dute la semblee dal popul di Israel lu sacrificarà sul lâ a mont dal soreli. O cjolarêis une zumiele dal so sanc e lu metarêis su lis dôs antis e sul frontâl des cjasis là che lu mangjarêis.

Ta chê stesse gnot si mangjarà la cjar rustide sul fûc; si le mangjarà cul pan cence levan e cun jerbis maris. O vês di mangjâlu cussì: cu la cinturie sui ombui, i sandui tai pîts e il baston in man. Lu mangjarêis in premure: e je la Pasche dal Signôr. Ta chê stesse gnot jo o passarai par dut l'Egjit e o fruçarai ducj i prins nassûts de tieres dal Egjit, oms e nemâi, e o fasarai sentence di ducj i dius dal Egjit, jo, il Signôr. Il sanc al sarà par vualtris un segnâl su lis cjasis là ch'o sêis a stâ. Viodint chest segnâl, jo o passarai dret e vualtris no us sfiliarà il flagel de distruzion cuant che o vuaiarai l'Egjit. Chê di vualtris le tignarêis simpri in memorie e o fasarêis fieste pal Signôr; le ricuardarêis di ete in ete. Al è un decret par simpri».

Peraule di Diu.

## SALM RESPONSORIÂL

dal Salm 115

*Cumò la riflession e passe dal popul a une ande personâl. Il salm complet, siôr di emozions, di fiducie in Diu, di agrât al Signôr, si lu cjate tal Salteri al n. 116.*

*Il salmist al pense a ce che in ben e in mál al à vivût e te pâs da l'anime al conclût: O alçarai il cjaliç de salvece.*

*Ancje culi il pinsir al va al cjaliç che te celebrazion eucaristiche al ten il sanc preziôs di Crist: sanc dal pat, spandût par noaltris e par unevore di lôr in remission dai pecjâts (Cfr. Mt 26, 28).*

**R. Il to cjaliç, Signôr, al è un regâl di salvece.**

*Se cjantât, il cjant dai salms responsoriâi, p. 27.*

Cemût fasaraio a paia il Signôr  
di dut il ben che mi à fat lui?  
O alçarai il cjaliç de salvece  
e o clamarai il non dal Signôr. **R.**

E je cetant preseade paia vói dal Signôr  
la muart dai siei amîs.  
E jo, Signôr, o soi un to famei,  
to famei e fi de tò sierge.  
Tu tu âs crevadis lis mês cjadenis. **R.**

Un sacrifici di laut ti ufrissarai  
e o clamarai il non dal Signôr.  
O sodisfasarai ducj i miei avôts cul Signôr  
in face di dut il so popul. **R.**

## SECONDE LETURE

1 Cor 11,23-26

**Ogni volte che vualtris o mangjais chest pan e o bevês chest cjaliç, o contais la muart dal Signôr.**

*Al jere forzit il 57 d. C. cuant che s. Pauli al scriveve cheste letare. Culì o cjatìn la plui antighe testemoneance de ultime cene dal Signôr e de gnove aleance tal so sanc. Culì e je ancje la risultive de messe: fasêt cussì, in memorie di me.*

### De prime letare di san Pauli apuestul ai Corints

Fradis, jo o ai vût dal Signôr ce che us ai consegnât: che il Signôr Gjesù, te gnot che lu an tradît, al à cjapât sù il pan, e, fat il ringraziament, lu à crevât e al à dit: «Chest al è il gno cuarp, ch' al è par vualtris; fasêt cussì in memorie di me». Te stesse maniere, dopo di vê cenât, al à cjapât sù ancje il cjaliç disint: «Chest cjaliç al è la gnove aleance tal gno sanc; fasêt cussì, ogni volte che int bevarês, in memorie di me». Scheduncje ogni volte che vualtris o mangjais chest pan e o bevês chest cjaliç, o contais la muart dal Signôr, fin che nol torne.

Peraule di Diu.

## CJANT AL VANZELI

Cfr. Zn 13,34

**R. Glorie e laut a ti, Crist Signôr!**

Us doi un comandament gnûf, al dîs il Signôr:  
che si voledis ben un cul altri;  
come che ancje jo us ai volût ben a vualtris.

**R. Glorie e laut a ti, Crist Signôr!**

## VANZELI

Zn 13,1-15

**Ur volè ben fint al colm.**

*Zuan nol conte, come Matieu Marc e Luche, l'istituzion de Eucaristie. Lui, de ultime cene, al ricuarde Gjesù che come un sclâf, inzenoglât devant dal paron, al tacà a lavâ i pîts dai siei dissepui.*

*I studiâts si son simpri domandâts dal parcè che l'evangelist al tâs lis peraulis santis: chest al è il gno cuarp - chest al è il gno sanc (Mc 14, 22. 23) e nus tramande invezit chel: ancje vualtris o vês di lavâsi i pîts un cul altri. Une rispueste e je cheste: za fra i prins cristians al començave a jessi plui facil partecipâ a une riunion liturgjiche pluitost che sbassâsi a condividi lis penis un tribulât. Ma Gjesù propit te ultime cene nus vise: us ai dât l'esempli par che ancje vualtris o fasê come che jo us ai fat a vualtris.*

**Dal vanzeli seont Zuan**

Prime de fieste di Pasche, savint Gjesù ch'e jere rivade la sô ore di passâ di chest mont li dal Pari, dopo di vêur volût ben ai siei ch'a jerin in chest mont, ur volè ben fint al colm. E intant de cene, cuant che il diaul i veve za metût tal cûr a Gjude di Simon Iscariot di tradîlu, savint che il Pari i veve metût dut tes sôs mans e ch'al jere saltât fûr di Diu e al tornave a Diu, al jeve sù de taule, algjave il mantiel e, cjolt un suiemman, sal peà tor de vite. Po al strucje aghe intun cjadin e al tacà a lavâ i pîts dai siei dissepui e a suiâju cul suiemman ch'al veve tor de vite. Al rive duncje li di Simon Pieri. I dîs: «Signôr, tu tu mi lavis i pîts a mi?». I rispuindè Gjesù: «Ce che o fâs, tu cumò no tu lu capissis; tu lu capissarâs plui indenant». I dîs Pieri: «Tu no tu mi lavarâs i pîts. Mai plui e mai altri». I rispuindè Gjesù: «Se no ti lavi, no tu varâs part cun me». I dîs Simon Pieri: «Signôr, no dome i miei pîts, ma ancje lis mans e il cjâf». I dîs Gjesù: «Chel ch'al à fat il bagn, al baste che si lavi i pîts, ch'al è za dut mont; ancje vualtris o sêss monts, ma no ducj». Di fat al saveve cui ch'al stave par tradîlu, par chest al disè: «No sêss ducj monts».

Finît duncje di lavâur i pîts, al tornà a cjoli il so mantiel, si sentà e ur disè: «Capiso ce che us ai fat? Vualtris mi clamais mestri e Signôr e o disê ben, parcè che lu soi. Poben, se jo, il Signôr e il mestri, us ai lavâts i pîts, ancje vualtris o vêss di lavâsi i pîts un cul altri. Di fat us ai dât l'esempli par che ancje vualtris o fasêss come che jo us ai fat a vualtris».

Peraule dal Signôr.

**Rît de lavande dai pîts.**

### Su lis ufiertis

Danus la gracie, Signôr,  
di celebrâ chescj misteris dispès e cun fede,  
parcè che ogni volte che si fâs memorie di chest sacrifici  
si colme la vore de nestre redenzie.  
Par Crist nestri Signôr.

### Antifone a la comunion

1 Cor 11,24-25

Chest al è il gno Cuarp, ch'al è par vualtris;  
chest cjaliç al è la gnove aleance tal gno Sanc,  
al dîs il Signôr.

Fasêt chest, ogni volte che int bevarêss,  
in memorie di me.

### Daspò de comunion

Danus la gracie, Diu onipotent,  
che come che si sostentin a la Cene di to Fi in cheste vite,  
cussì o mertin di jessi saciâts inte Cene eterne.  
Par Crist nestri Signôr.

**L'Eucaristie e ven puartade al altâr de riposizion. Intant de procession si cjante il *Pange lingua*.**

**La celebrazion si conclût.**

*La glesie e reste par cualchi ore vierte par dâ la pussibilitât di podê intratignîsi cul Signôr ricuardant il so lament incorât cuant che po al torne dai dissepui e ju cjate indurmidîts; i dîs a Pieri: "Cussì no sêss stâts bogns di veglâ cun me nancje un'ore? La mê anime e je avilide a muart (Mt 26, 40, 38).*

*Si medite in particolâr su la passion interiôr di nestri Signôr: Mt 26, 36-44; Mc 14, 32-42; Lc 22, 39-46; Zn 12, 27-33.*

*Salm 21: Diu gno, Diu gno parcè mo mi âstu bandonât.*

### Cjants di Joibe sante

- Ubi caritas est vera, Deus ibi est n. 148;
- Cuant che vêr amôr al regne, n. 149;
- O Gjesù che tu sêts muart, n. 150;
- Vegrît a cene, n. 152;
- Mistero della cena, n. 60;
- Tu nella notte triste, n. 153;
- Pange lingua n. 57;
- Al è just che di ogni bande n. 58;
- Genti tutte proclamate, n. 59 .
- 
- **Salm 115:** O ai vude fede, cun dut ch'o disevi, n. 268;
- **Salm 21:** Diu gno, Diu gno parcè mo mi âstu bandonât, n. 240.

**Tal libri Hosanna,** si puedin cjatâ ancjemò altris cjants e salms adats.

\* \* \*

*Se jo il vuestri Signôr e Mestri, us ai lavâts i pâts,  
tant plui vualtris no vêso di lavâsi i pâts un cul altri?  
Di chest a ricognossaran ducj ch'o sêts miei dissepiui,  
s'o varês afiet un pal altri.*

*Lavande dai pâts, antifonis.*

\* \* \*

\* I cjants, salms e cjantadis a vegnin ripuartâts cu la numerazion dal libri: *Hosanna, Cjants e preieris dal popul furlan*, Ed. Glesie Furlane, 2012.

\* Il cjant dai salms resposoriâi, Ed. Glesie Furlane, 2012.

\* 50 corâi de cristianitât todescje voltâts par furlan, ed. Glesie Furlane, 2016.

\* Il libri des riflessions sul Vanzeli al è: pre Antoni Beline, *Vanzeli par un popul, an A*, Ed. Arti Grafiche Friulane.

\* Par domandâ chescj libris scrivêt a [info@glesiefurlane.org](mailto:info@glesiefurlane.org)

## VINARS SANT «in Passione Domini» Jutoris pe Liturgjie

14 di Avrîl

*La liturgjie dal Vinars sant si sprolungjie in trê parts: chê de peraule che si conclût cu la preiere universâl; adorazion de sante crôs e la sacre communion.*

*Sore dut te seconde e tierce part il Messalin al ripuarte tantis rubrichis che a servissin plui al celebrant che a la int. Però, framieç des rubrichis a son ponûts cjants e preieris che nus judaran une vore te contemplazion de crôs di nestri Signôr.*

*Liturgjie di compagnâ plui cul silenzi che cu la peraule, plui cu la interiortât personâl che cu lis spiegazions.*

*Come che al dîs il Stabat mater:* E volê fâi companie / inte lungje sô agonie / fin ai ultims siei moments.

### Preiere

Visiti, Signôr, dal to boncûr;  
santifice e vuarde par simpri  
chescj tiei servidôrs che Crist, to Fi,  
spandint il so sanc, al à screât par lôr il misteri pascâl.  
Lui ch'al vîf e al regne tai secui dai secui.

R. Amen.

### O ben:

Diu, che cu la passion di to Fi e nestri Signôr  
tu âs crevadis lis cjadenis de muart,  
passade in ereditât a ducj i umign par vie dal pecjât vieri,  
danus la gracie di deventâ compagns di lui  
e come che par nécessitat di nature  
o vin puartât il stamp dal om mortâl,  
cussì la gracie sante nus fasi puartâ il stamp dal om dal cîl.  
Par Crist nestri Signôr.

R. Amen.

### PART PRIME:

#### LITURGJIE DE PERAULE

##### PRIME LETURE

Is 52,13-53,12

Lui al è stât passât fûr par fûr par colpe dai nestri pecjâts.

Cuart ejant dal Servidôr dal Signôr

*In chest quart cjant dal Servidôr o tornin a cjadâ il ritrat, la riflession, meditazion e contemplazion de passion di Crist. No son peraulis par comentâ; nol reste che restâ tal cidin, anime e cûr vierts a cjalâ il nestri Salvadôr che nol veve ni presince ni bielece, di fâsi cjalâ di nô, ni sflandôr tant di podê preseâlu.*

### Dal libri dal profete Isaie

Ve, il gno servidôr al varà bon esit, al sarà puartât in alt, alcât e laudât une vorone. Come che tancj di lôr a son restâts sul cont di lui, – tant al jere disfigurât il so aspiet, diferent di chel di un om, e la sô figure diferente di chê dai fîs dal om –, cussì cetancj forescj a restaran scaturîts, i rês si stroparan la bocje a rivuart di lui, parcè che a viodaran ce che no ur jere stât contât, e a capissaran ce che no vevin sintût.

Cui aial crodût a la nestre gnove, e a di cui si esal pandût il braç dal Signôr? Al è cressût tant che un butul denant di lui, e tant che une lidris ch'e salte fûr de tieres arsinide. Nol veve ni presince ni bielece, di fâsi cjalâ di nô, ni sflandôr tant di podê preseâlu. Spreeât, butât di bande dai oms, om dai dolôrs, ch'al sa ce ch'al è il patî, compagn di un che denant di lui si taponisi la muse, spreeât, che no vin fat nissun câs di lui.

Epûr lui al à puartadis lis nestris infermitâts e si è cjamât sù i nestris dolôrs. Nô lu vin considerât tant che un cjadiât, pestât di Diu e umiliât. Ma lui al è stât passât fûr par fûr par colpe dai nestris pecjâts, al è stât sfracaiât par colpe des nestris tristeriis. Il cjastic che nus da la pâs al è plombât

parsoire di lui, e midiant des sôs plais nô o sin stâts vuarîts. O levin indenant ducj a sorte tant che pioris, ognidun di nô al leve pe sô strade, e il Signôr al à fate colâ parsoire di lui la tristerie di ducj nô. Maltratât, lui si è umiliât e nol à vierzude bocje; tant che un agnel menât al macel, tant che une piore ch'e tâs denant di chei che le tosin, nol à vierzude bocje. Al è stât gjavât di mieç cun violence e cun condane; cui bacilial pal so distin? Propit, al è stât gjavât vie de tieres dai vîfs, par colpe de inicuitât dal so popul al è stât pestât a muart. I an dade sepulture framieç dai triscj, e il so tombâl al è framieç dai delincuents, seben che nol veve fate ombre di violence e no 'nd jere nissun imbroi inte sô bocje.

Ma al Signôr i à parût ben di fruçâlu cul patî; s'al ufris la sô vite tant che un sacrifici di espiazion, al viodarà une dissidence ch'e vivarà a lunc, e midiant di lui si fasarà la volontât dal Signôr. Par vie dal torment de sô anime al viodarà la lûs, si passarà de sô cognossince. Il gno servidôr just al justificarà tancj di lôr, cjapantsi sù lui lis lôr inicuitâts.

Par chel i darai par premi int a no finî, e al spartissarà il rafât insieme cui potents, parcè che al à ufierte la sô persone a la muart, e al è stât contât framieç dai delincuents. Invezit lui al à puartât il pecjât di tancj di lôr, e al à intercedût pai pecjadôrs.

Peraule di Diu.

## SALM RESPONSORIÂL

dal Salm 30

*Ancje chest salm nus jude a stâ dongje de passion di Crist. Di fat o cjatin culì lis peraulis dal Signôr in crôs: Pari, tes tôs mans o racomandi il gno spirt (Lc 23, 46) - Tes tôs mans o met la mê vite (Salm 30). Ancje chest salm, come la prime leture nus conte ce che al passave tal cûr di un martar dai temps antigons, ce che Crist al à provât te sôumanât e i patiments forzit scuindûts di un tribulât dongje di nô te societât di vuê.*

### R. Pari, tes tôs mans o met la mê vite.

*Se cjantât, il cjant dai salms responsoriâi, p. 28.*

Li di te, Signôr, o voi a parâmi:

che no vedi di jessi deludût par simpri.

Deliberimi te tô justizie.

Tes tôs mans o met la mê vite;

sfrancjimi, Signôr, Diu di peraule. R.

O soi deventât une vergogne par ducj chei che mi tibiin,  
une disgracie par chei dongje;  
ur fâs spezie a di chei che mi cognossin;  
chei che mi intivin pe strade  
a pene che mi viodin a scjampin.

O soi dut ingrisignît come un muart che nol à plui vite,  
come une robe za fruiade. R.

Ma jo mi fidi di te, Signôr, lu torni a dî:  
«Tu sêts tu il gno Diu;  
lis tôs mans il gno distin a strenzin».  
De prepotence dai miei nemîs liberimi  
e di chei ch'a cirin di brincâmi. R.

Fâs lusî la tô muse sul to famei;  
salvimi pal to boncûr.  
Sù mo, fasêtsi coragjo,  
ducj vualtris ch'o vês fede tal Signôr! R.

## SECONDE LETURE

Eb 4,14-16; 5,7-9

Cri st al à imparât a ubidî e al è deventât risultive di salvece eterne par ducj chei che i ubidissin.

*In cheste seconde leture l'autôr nus racomande di tignî salde la nestre fede. Di fat, Crist dopo di vê ufiert preieris e suplichis cun grancj berlis e lagrimis, al à travanât i cîi e si è sentât a la diestre de maiestât adalt tai cîi (Eb 1, 3).*

Svicininsi duncje cun plene fiducie a la sente de gracie, par vê la remission, par cjatâ gracie e par jessi judâts tal moment just. *Chest al è il mes di amôr e di misericordie di nestri Signôr tal so vinars di passion par nô.*

## De letare ai Ebreos

Fradis, stant un prin predi che nol sedi bon ch'o vin un prin predi ch'al à travanât i cîi, Gjesù, Fi di Diu, tignîn salde la nestre fede. Di fat no vin di vê dûl des nestris pecjis, sint stât provât ancje lui in dut come nô, fûr che tal pecjât. Svicininsi duncje cun plene fiducie a la sente de gracie, par vê la remission, par cjatâ gracie e par jessi judâts tal moment just.

Crist, tai dîs de sô vite sun cheste tiere, lui al à ufiert preieris e suplichis cun grancj berlis e lagrimis a di chel ch'al podeve sfrancjâlu de muart e al è stât scoltât pe sô ubidience. Seben ch'al jere Fi, al à imparât, patint, a ubidî e, dopo di jessi rivât al colm, al è deventât risultive di salvece eterne par ducj chei che i ubidissin.

Peraule di Diu.

## CJANT AL VANZELI

cf. Fil 2,8-9

**R. Glorie e laut a ti, Crist Signôr!**

Par nô Crist si è fat ubidient fint a la muart  
e a la muart di crôs.

Par chel Diu lu à puartât in alt e i à dât chel non  
ch'al è plui alt di ogni altri non.

**R. Glorie e laut a ti, Crist Signôr!**

**VANZELI**

Zn 18,1-19,42

**Passion dal Signôr**

*No stin a cjalâ dome la crôs, ma ancje scoltìn chel dissepul ch'al à viodût e ch'al à fat di testemoni e la sô testemoneance e je vere e lui al sa di dî il vêr, par che o crodês ancje vualtris.*

## Passion di nestri Signôr Gjesù Crist seont Zuan

In chê volte, Gjesù al saltâ fûr cui siei dissepui di là dal riul dal Cedron, là ch'al jere un zardin, e li al jentrà lui e i siei dissepui. Ancje Gjude, ch'al jere daûr a tradîlu, al cognosseve ben il puest, parcè Gjesù si jere cjatât tantis voltis li cui siei dissepui. Alore Gjude, cjapade sù la companie dai soldâts e lis vuardiis dai sorestant dai predis e dai fariseos, al va li cun ferâi, torcis e armis. Gjesù, savint dut ce ch'al stave par capitâi, si fasè indenant e ur disè: «Cui ciriso?». I rispunderin: «Gjesù il Nazaren». Ur dîs: «O soi jo». Cun lôr al jere ancje Gjude, che lu tradive. Finît di dîur: «O soi jo», a cessarin e a plombarin par tiere. Alore ur domandà un'altre volte: «Cui ciriso?». E lôr i diserin: «Gjesù il Nazaren». Gjesù ur rispuindè: «Us al ai za dit che o soi jo. Se duncje mi cirîs me, lassait lâchei chi». Cussì si colmà la peraule ch'al veve dite: «Di chei che tu mi âs dât, no 'nd ai pierdût nissun». Alore Simon Pieri, ch'al veve une spade, le gjavâ de fodre e i molà un coup al famei dal sorestant dai predis e i cjonçà la orele gjestre; chel famei al veve non Malc. Ma Gjesù i disè a Pieri: «Torne met la spade te fodre. No aio forsit di bevi il cjaliç che il Pari mi à dât?». Alore la companie dai soldâts e il comandant e lis vuardiis dai gjudeos a cjaparin Gjesù, lu learin e lu menarin prin di dut li di Ane. Di fat lui al jere missêr di Caife, sorestant dai predis di chel an. Caife al jere chel che ur veve dât ai gjudeos chest consei: «Al conven ch'al mueri un om sôl pal popul».

A levin daûr di Gjesù Simon Pieri e ancje un altri dissepul. Chest dissepul al jere cognossût dal sorestant dai predis, e al jentrà cun Gjesù tal curtîl dal sorestant dai predis. Pieri invezit al stave difûr, denant de puarte. Al jessi duncje chel altri dissepul ch'al cognosseve il sorestant dai predis, i

fevelà a la fantate e al fasè jentrâ ancje Pieri. Cheste fantate, puartonere, i dîs a Pieri: «No sêstu ancje tu un dai dissepui di chest om?». I rispuidè: «Po no, lafè! ». Midiant ch'al jere frêt, i servidôrs e lis vuardiis a vevin impiade une fughere e a stavin li a sclipisi. Ancje Pieri al jere cun lôr e si sclipive.

Il sorestant dai predis al interpelà Gjesù a rivuart dai siei dissepui e de sô dutrine. I rispuindè Gjesù: «Jo o ai fevelât franc al mont. O ai simpri insegnât te sinagoghe e tal templi, là che si dan dongje ducj i gjudeos, e no ai mai dit nuie di scuindon. Parcè mi interpelistu? Interpele chei che mi an scoltât, ce che ur ai dit. Ve, lôr a san ce che ur ai dit». Gjesù nol veve nancje finît di dî cussì che une vuardie, di chêz ch'a jerin li, i molà un pataf a Gjesù disint: «Si rispuindial cussì al sorestant dai predis?». I rispuindè Gjesù: «Se o ai fevelât mâl, mostrimi là ch'al è il mâl. Ma se o ai fevelât ben, parcè mi patafstu?». Alore Ane lu mandà, leât, dal sorestant dai predis, Caife.

Tal fratimp, Simon Pieri al stave li a sclipisi. I diserin: «No sêstu par câs ancje tu un dai siei dissepui?». Lui al dineà e al disè: «Po no, lafè! ». I dîs un dai servidôrs dal sorestant dai predis, parint di chel che Pieri i veve ejonçade la orele: «Po no ti aio viodût jo tal zardin cun lui?». Alore Pieri al tornà a dineâ, e juste in chel al cjantà un gjal.

Alore a menin Gjesù di Caife al pretori. Al jere une vore a buinore. E lôr no jentrarin tal pretori par no insoçâsi e podê cussì mangjâ la Pasche. Duncje Pilât al saltâ fûr là ch'a jerin lôr e ur disè: «Ce acuse puartaiso indenant cuintri di chest om?». I rispuinderin: «Se chel chi nol fos un delincuent, no tal varessin metût tes tôs mans». Ur disè Pilât: «Tignitsal vualtris e judicaitlu seont la vuestre leç!». I diserin i gjudeos: «A nô no nus è permetût di condanâ a muart nissun». E veve cussì di colmâsi la peraule che Gjesù al veve dite, intindint di ce muart ch'al veve di murî.

Alore Pilât al jentrà di gnûf tal pretori, al clamà Gjesù e i disè: «Sêstu tu il re dai gjudeos?». I rispuindè Gjesù: «Disistu chest di cjâf to o tal ano contât altris sul gno cont?». I rispuindè Pilât: «Soio par câs un gjdeo? La tô int e i sorestants dai predis ti an metût tes mês mans. Ce âstu cumbinât?». I rispuindè Gjesù: «Il gno ream nol è di chest mont. Se il gno ream al fos di chest mont, lis mês vuardiis si saressin batudis par no ch'o fos consegnât tes mans dai gjudeos. Ma il gno ream nol è di chenti». I disè alore Pilât: «Sêstu duncje re?». I rispuindè Gjesù: «Tu disis ancje tu che jo o soi re. Par chel jo o soi nassût e par chel jo o soi vignût tal mont. Par fâ di testemoni a la veretât. Ducj chei ch'a son de bande de veretât, a scoltin la mê vôs». I dîs Pilât: «Ma ce ese la veretât?». Dopo dit cussì, al tornà fûr di gnûf là ch'a jerin i gjudeos e ur dîs: «Jo no cjati in lui nissun rimpin par condanâlu. Vualtris però o vês l'usance che jo us liberi cualchidun sot Pasche. Volêso duncje che us liberi il re dai gjudeos?». Alore a tacarin a berghelâ: «No lui, ma Barabe!». E Barabe al jere un brigant.

Alore Pilât al cjapà Gjesù e lu fasè flagjelâ. E i soldâts a tiesserin une corone di spinis, je meterin sul cjâf e lu riviestirin di un mantiel di purpure; e i levin dongje disint: «Salve, re dai gjudeos!». E lu scufiotavin. Pilât al tornà fûr un'altre volte e ur disè: «Ve che us al meni fûr, par ch'o sepis che no cjati in lui nissun rimpin par condanâlu». Siceduncje Gjesù al jessi fûr puartant la corone di spinis e il mantiel di purpure. E ur dîs: «Velu l'om!». Cuant che però lu vioderin, i sorestants dai predis e lis vuardiis a tacarin a berlâ: «Metilu in crôs! Metilu in crôs!». Ur dîs Pilât: «Tignitsal vualtris e metêtsal in crôs, parcè che jo no cjati in lui nissun rimpin par condanâlu». I rispuinderin i gjudeos: «Nô o vin une leç e seont cheste leç al à di murî, parcè che si è fat Fi di Diu».

Cuant che al sinti chest discors, Pilât al cjapà ancjemò plui pôre. Al tornà dentri tal pretori e i dîs a Gjesù: «Tu d'indulà sêstu?». Gjesù no i rispuindè peraule. I dîs alore Pilât: «No tu vuelis fevelâmi? No sâstu che jo o ai il podê di liberâti e o ai il podê di metiti in crôs?». I rispuindè Gjesù: «Tu no tu varessis nissun podê sore di me se no ti fos dât di adalt. Pa la cuâl chel che mi à metût tes tôs mans al à un pecjât plui grant».

Di chel moment Pilât al cirive di liberâlu. Ma i gjudeos a berlavin saldo: «Se tu liberis chel chi, no tu sê amì di Cesar. Ducj chei che si fasin rês, si metin cuintri di Cesar». Sintint chestis peraulis, Pilât al menâ fûr Gjesù e si sentâ suntune tribune tal lûc che i disin Pedrât di piere, par ebraic Gabatâ. Si stave preparant la Pasche, tor misdì. Ur dîs ai gjudeos: «Ve il vuestri re!». Alore chei a scomençarin a berlâ: «Vie, vie, metilu in crôs!». Ur dîs Pilât: «Aio propit di meti in crôs il vuestri

re?». I rispuinderin i sorestants dai predis: «Nô no vin nissun altri re fûr di Cesar!». Alore ur al molâ par che lu metessin in crôs.

A cjaparin duncje in consegne Gjesù. E, puartantsi dibessôl la sô crôs, al jessì viers il lûc che i disin de Crepe, par ebraic Golgot, là che lu meterin in crôs e cun lui altris doi: un di une bande e un di chê autre, e tal mieç Gjesù. Pilât al veve scrit ancje un cartel e lu veve piejât parsore de crôs. Al jere scrit: «Gjesù il Nazaren, il re dai gjudeos». Une vore di gjudeos a leierin chest cartel parcè che il lûc là ch'a meterin in crôs Gjesù al jere dongje de citât, e al jere scrit par ebraic, par latin e par grêc. I sorestants dai predis dai gjudeos a tentarin di dîs a Pilât: «No sta lassâ scrit: Il re dai gjudeos, ma scrit: Chel chi al à dit: Jo o soi il re dai gjudeos». Ur rispuindè Pilât: «Ce ch'o ai scrit, o ai scrit».

I soldâts, cuant che a meterin in crôs Gjesù, a cjaparin lis sôs viestis e int faserin cuatri parts, une part par ogni soldât, e ancje la tonie. Ma la tonie e jere cence cusiduris, tiessude dute interie d'insom fin dapît. Si diserin duncje un cul altri: «No stin a dividile, ma tirin a bruscjete a cui che i tocje». Al è cussì che si colmà la Scriture ch'e veve dit: "Si son dividudis fra di lôr lis mês viestis e pal gno vistît a an tirât a bruscjete". E i soldâts a faserin propit cussì.

Dongje de crôs di Gjesù a jerin sô mari, la sûr di sô mari, Marie di Cleofe e Marie la Madalene. Gjesù duncje, viodude la mari e dongje di jê il dissepul che i voleve ben, i dîs a sô mari: «Femine, ve chi to fi!». Po i dîs al dissepul: «Ve chi tô mari!». E d'in chê volte il dissepul le ejolè in cjase sô. Dopo di chest, savint Gjesù che al jere za dut fat, par che si colmàs la Scriture al dîs: «O ai sêt». Al jere li un vâs plen di asêt; a saldarin duncje une spugne imbombade di asêt tor di un ramaç di issop e je meterin dongje de bocje. Subit dopo supât l'asêt, Gjesù al disè: «Al è dut fat»; e, sbassât il cjâf, al rindè il spirt.

### Chi si inzenogli si fâs une piçule polse.

I gjudeos, stant ch'e jere la di de Preparazion, par no che i cuarps a restassin su la crôs di sabide (di fat chê sabide e jere une zornade grande), i domandarin a Pilât che ur crevassin lis gjambis e a fossin puartâts vie. A rivarin duncje i soldâts e i crevarin lis gjambis al prin e ancje a di chel altri ch'a jerin stâts metûts in crôs cun lui. Rivâts li di Gjesù, stant che lu vioderin za muart, no i crevarin lis gjambis, ma un dai soldâts, cuntun coup di lance, i passâ il flanc fûr par fûr e a coup al spissulâ sanc e aghe. Chel ch'al à viodût al à fat di testemoni e la sô testemoneance e je vere e lui al sa di dî il vêr, par che o crodês ancje vualtris. Chest al sucedè par che si colmàs la Scriture: "No i vignarà crevât nance un vues"; e ancje un'altre Scriture, ch'e dîs: "Si voltaran a cjalâ chel ch'a an passât fûr par fûr".

Dopo di chescj fats, Josef di Arimatee, ch'al jere dissepul di Gjesù, ma segret par pôre dai gjudeos, i domandà a Pilât di tirâ vie il cuarp di Gjesù. E Pilât i disè di sì. Al rivâ duncje e al tirâ vie il cuarp.

Al rivâ ancje Nicodem, che za prime al veve vût stât di lui di gnot, e al puartâ un miscliç di mire e di aloe di un cent libris. A cjaparin duncje il cuarp di Gjesù e lu invuluçarin cun fassis insieme cui profums, daûr l'usance di sapulî dai gjudeos.

Tal lûc là che lu vevin metût in crôs al jere un zardin e tal zardin un sepulcri gnûf crei, che no vevin metût dentri inmò nissun. Li, par vie de Preparazion dai gjudeos e stant ancje che il sepulcri al jere dongje, a meterin Gjesù.

Peraule dal Signôr.

## Preiere universâl

### I. Pe Glesie sante

#### Preìn, fradis benedets, pe Glesie sante di Diu,

che il Signôr nestri Diu si indegni di dâi unitât e pâs,

le vuardi sun dute la tiere,

e nus concedi a nô une vite serene e cence pôris

par podê dâi a Diu Pari onipotent dute la glorie.

### Si pree cidins. Po il predi:

Diu onipotent e eterni,

che in Crist to Fi tu âs palesât a ducj i popui la tô glorie,  
vuarde la vore dal to boncûr,  
in mût che la tô Glesie, sparniçade par dute la tiere,  
e conduri te saldece de fede e te confession dal to non.  
Par Crist nestri Signôr.

R. Amen.

## II. Pal Pape

**Preìn ancje pal nestri Pape N.,**

par che il Signôr nestri Diu,  
che lu à sielzût tal ordin episcopâl,  
lu salvi e lu conservi pe sô sante Glesie,  
par rezi il popul sant di Diu.

**Si pree cidins. Po il predi:**

Diu onipotent e eterni,  
che su la tô sapience si fondin dutis lis robis,  
scolte vulintîr lis nestris preieris  
e conserve tal to bonvolê il pastôr che tu âs sielzût par nô,  
in mût che il popul cristian, che tu simpri tu rezis,  
sot la sô guide pontifical al puedi cressi inte fede.  
Par Crist nestri Signôr.

R. Amen.

## III. Par ducj i ordins e grâts dai fedêi

**Preìn ancje pal nestri Vescul N.,**

par ducj i Vescui, i predis, i diacuns de Glesie  
e par dut il popul dai fedêi.

**Si pree cidins. Po il predi:**

Diu onipotent e eterni,  
che il to Spirt al santifice e al rêç dut il cuarp de Glesie,  
scolte ce che ti domandin pai tiei servidôrs  
in mût che, cul regâl de tô gracie,  
a puedin servîti ducj in plene fedeltât.  
Par Crist nestri Signôr.

R. Amen.

## IV. Pai catecumenis

**Preìn pai (nestris) catecumenis,**

par che il Signôr nestri Diu  
al vierzi lis orelis dal lôr cûr  
e la puarte de sô misericordie,  
di mût che cu la lavade di rigjenerazion  
a puedin vê il perdon di duej i pecjâts  
e jessi incorporâts in Crist Gjesù nestri Signôr.  
**Si pree cidins. Po il predi:**

Diu onipotent e eterni,  
che tu fasis la tô Glesie simpri feconde di gnovis creaturis,  
fâs cressi la fede e l'inteligence dai (nestris) catecumenis

in mût che, tornâts a nassi dal font batisimâl,  
a sedin acetâts framieç dai tiei fis d'anime.

Par Crist nestri Signôr.

R. Amen.

#### V. Pe unitât dai cristians

**Preìn ancje par ducj i fradis ch'a crodin in Crist,**  
par che il Signôr nestri Diu ur dedi la gracie di vivi la veretât  
par jessi tirâts dongje e vuardâts inte uniche sô Glesie.

**Si pree cidins. Po il predi:**

Diu onipotent e eterni,  
che tu tiris dongje chei ch'a son dispierdûts  
e tu conservis chei che tu âs tirâts dongje,  
cjale di bon voli il trop di to Fi  
in mût ch'a sedin metûts adun  
midiant de integratâ de fede e de cjadene dal amôr  
chei ch'a son stâts consacrâts dal unic batisim.

Par Crist nestri Signôr.

R. Amen.

#### VI. Pai Ebreus

**Preìn ancje pai Ebreus,**  
il Signôr nestri Diu, che a lôr par prins ur à fevelât,  
ur dedi di lâ simpri indenant intal bonvolê pal so non  
e inte fedeltât a la sô aleance.

**Si pree cidins. Po il predi:**

Diu onipotent e eterni,  
che tu âs fatis lis tôs promessis a Abram e a la sô dissendence,  
scolte lis preieris de tô Glesie,  
in mût che il popul de prime aleance  
al merti di rivâ a la plenece de redenzie.

Par Crist nestri Signôr.

R. Amen.

#### VII. Par chei che no crodin in Crist

**Preìn ancje par chei che no crodin in Crist,**  
par che, inluminâts cu la lûs dal Spiritu Sant,  
a puedin jentrâ ancje lôr te strade de salvece.

**Si pree cidins. Po il predi:**

Diu onipotent e eterni,  
fâs che chei che no proclaimin Crist  
ma a cjaminin denant di te cu la scletece dal lôr cûr, a cjatin la veretât,  
e fâs che nô, judantsi un cul altri a cressi intal bonvolê  
e seneôs di lâ plui a font tal misteri de tô vite,  
o deventin tal mont testimonis plui fedêi dal to amôr.

Par Crist nestri Signôr.

R. Amen.

### VIII. Par chei che no crodin in Diu

**Preìn ancje par chei che no cognossin Diu,**  
par che, fasint cun onestât di cûr lis robis justis,  
a puedin mertâ di rivâ fin li di lui.

**Si pree cidins. Po il predi:**

Diu onipotent e eterni,  
che tu âs creât ducj i umign  
in mût che ti cirin simpri cun brame  
e a puedin polysâ dome daspò di vêti ciatât,  
fâs par plasê che,  
fra i tancj ostacui di ogni sorte,  
ducj a puedin ricognossi i segnâi dal to boncûr  
e, invoâts de testemoneance e des buinis oparis di chei che in te a crodin,  
a vedin la furtune di proclaimâti unic e vêr Diu, Pari di dute l'umanitât.

Par Crist nestri Signôr.

**R. Amen.**

### IX. Par chei ch'a rezin la vite publiche

**Preìn ancje par ducj chei ch'a rezin la vite publiche,**  
par che il Signôr nestri Diu  
al indreci seont il so volê il lôr cjâf e il lôr cûr  
tal cirî par ducj la vere pâs e la vere libertât.

**Si pree cidins. Po il predi:**

Diu onipotent e eterni,  
che tes tôs mans a son i cûrs dai oms e i dirits dai popui,  
cjale di bon voli chei ch'a àn l'autoritat di governâns,  
in mût che, cul to jutori, in ogni part de tiere  
e cressi la prosperitat dai popui,  
la pâs sigure e la libertât religjose.

Par Crist nestri Signôr.

**R. Amen.**

### X. Pai tribulâts

**Preìn, fradis benedets, Diu Pari onipotent**  
par ch'al liberi il mont di ogni sorte di disordin:  
al gjavi lis malatiis, al slontani la fan,  
al spalanchi lis presons, al crevi lis cjadenis,  
al vuardi chei ch'a son par strade,  
al fasi tornâ dongje chei ch'a son lontans,  
ur dedi la salût ai malâts e la salvece a di chei ch'a muerin.

**Si pree cidins. Po il predi:**

Diu onipotent e eterni,  
confuart dai avilâts e fuarce dai tribulâts,  
ch'a rivin fin li di te lis preieris  
di chei che in cualunche tribulazion ti cirin,  
in mût che ducj chei che ti àn clamât tes lôr dibisugnis  
a puedin gjoldi dal jutori de tô misericordie.

Par Crist nestri Signôr.

R. Amen.

## PART SECONDE:

### ADORAZION DE SANTE CRÔS

14. Finide la preiere universâl, si fâs l'adorazion solene de sante Crôs. Des dôs formis di ostension, che culi a vegnin presentadis, si sielç la plui adate daûr des esigjencis pastorâls.

#### Ostension de sante Crôs.

##### Prime forme

15. Il diacun cui ministris o un altri ministri competent al va in sacristie e di li al puarte in procession la Crôs, taponade cuntun vêl viole, pe glesie fint al presbiteri, compagnât di doi ministris cu lis cjanelis impiadis. Il predi, in pîts denant dal altâr e viers dal popul, al ricêf la Crôs, al distapone la part plui alte e le alce.

Intant al invide a l'adorazion disint: Ve chi il len de Crôs. Intal cjant i dan une man il diacun o, in câs, il coro. Ducj a rispuindin: Vignît e adorin. Finît di cjantâ, si inzenoglin e a adorin un moment cidins, bielche il predi, in pîts, al ten alçade la Crôs.

Ve chi il len de Crôs,  
là ch'e fo picjade la salvece dal mont.

R. Vignît e adorin.

Po il predi al distapone il braç gjestri de Crôs e, tornant a alçâ la Crôs, al invide a l'adorazion disint:  
Ve chi il len de Crôs, e si fâs come sore.

Po al distapone la Crôs dal dut e le alce invidant pe tierce volte a l'adorazion disint: Ve chi il len de Crôs, e si fâs come la prime volte.

##### Seconde forme

16. Il predi o il diacun, cui ministris, o un altri ministri competent al va a la puarte de glesie e li al ricêf la Crôs no taponade, compagnade dai ministris cu lis cjanelis impiadis. Si invie la procession pe glesie fint al presbiteri. Dongje de puarte, tal mieç de glesie e denant de jentrade dal presbiteri, chel ch'al puarte la Crôs le alce e al cjante: Ve chi il len de Crôs, e ducj a rispuindin: Vignît e adorin. Daspò di ogni rispueste siinzenoglin e a adorin un moment cidins, come sore.

#### Adorazion de sante Crôs

17. Podopo, il predi o il diacun, compagnât di 2 ministris cu lis cjanelis impiadis, al puarte la Crôs te jentrade dal presbiteri o tun altri lûc adat e le depon o le consegne ai ministris par che le tegnisiù, cu lis cjanelis poiadis a gjestre e a çampe de Crôs.

18. Par adorâ la Crôs si svicine par prin il predi celebrant dibessôl, dopo di vê gjavât, s'al è il câs, la casule e lis scarpis. Po a vegnin il clericât, i ministris laics, i fedêi cuntune sorte di procession e a fasin la lôrriverence a la Crôs cu la semplice zenuflession o cuntun altri segnâl adat, seont lis costumancis dal lûc, par exempli bussant la Crôs.

19. Si fâs une sole adorazion de Crôs. Se parvie de masse int no puedin svicinâsi un par un, il predi, daspò che une part di clericât e di fedêi e à fate l'adorazion, al cjape sù la Crôs e, stant tal mieç e denant dal altâr, al invide cun pocjis peraulis il popul a adorâ la sante Crôs e po al ten alçade par un trat di timp la Crôs, par che i fedêi a puedin adorâle cidins.

20. Intant de adorazion de sante Crôs si cjante l'antifone La tô Crôs, i Improperis, la cjante Crôs amade o altris cjants adats. Ducj chei ch'a àn fate l'adorazion a stan sentâts.

#### Cjants pe adorazion de sante Crôs

Ant. La tô Crôs o adorin, Signôr,  
e a la tô sante resurezion o din laude e glorie:  
parcè che midiant dal len e je rivade in dut il mont la gjonde.

Cf. Sal 66,2

Che Diu al vedi dûl di nô e nus benedissi,

ch' al fasi lusî parsore di nô la sô muse e al vedi dûl di nô.

**Si ripet l'antifone**

La tô Crôs...

### Improperis

Lis parts ch'a spietin a ognidun a vegnин indicadis cui numars 1 (prin coro), e 2 (secont coro); chêz ch'a van cjantadis dutune dai doi coros a vegnин indicadis cussì: 1 e 2. I versets a puedin jessi cjantâts ancje di doi cantôrs.

I

**1 e 2 Popul gno, ce ti aio fat?**

**Cuant ti aio maltratât? Rispuindimi!**

1 Parcè che ti ai tirât fûr de tiere dal Egjit:  
tu âs prontade la Crôs al to Salvadôr.

1 Haghios o Theós.

2 Sant Idu.

1 Haghios Ischyrós.

2 Sant e Fuart.

1 Haghios Athánatos, éléison himás.

2 Sant e Inmortal, ve dûl di nô.

1 e 2 Parcè che ti ai compagnât pal desert par corant'agns  
e ti ai nudrît cu la mane,  
e ti ai fat jentrâ tune tiere une vore buine:  
tu âs prontade la Crôs al to Salvadôr.

1 Haghios o Theós.

2 Sant Idu.

1 Haghios Ischyrós.

2 Sant e Fuart.

1 Haghios Athánatos, éléison himás.

2 Sant e Inmortal, ve dûl di nô.

**1 e 2 Ce vevio di fâ di plui par te, che no lu vedi fat?**

Jo ti vevi plantât tant che il gno plui biel vignâl  
e tu tu mi sêts deventât cence fin mareôs:  
di fat tu âs distudade la mêt sêt cul asêt  
e cuntune lance tu âs trapassât il flanc al to Salvadôr.

1 Haghios o Theós.

2 Sant Idu.

1 Haghios Ischyrós.

2 Sant e Fuart.

1 Haghios Athánatos, éléison himás.

2 Sant e Inmortal, ve dûl di nô.

II

### Cantôrs:

Par te jo o ai flagjelât l'Egjit cui siei primarûi:  
e tu tu mi âs consegnât par jessi flagjelât.

**1 e 2 a ripetin:**

Popul gno, ce ti aio fat? Cuant ti aio maltratât? Rispuindimi!

### Cantôrs:

Jo ti ai fat saltâ fûr dal Egjit, daspò di vê sumierzût il Faraon intal Mâr Ros:  
e tu tu mi âs consegnât ai sorestantz dai predis.

**1 e 2 a ripetin:**

Popul gno,...

**Cantôrs:**

Jo denant di te o ai viert il mâr:  
e tu tu âs viert il gno flanc cuntune lance.

**1 e 2 a ripetin:**

Popul gno,...

**Cantôrs:**

Jo o cjaminavi denant di te tune colone di nûl:  
e tu tu mi âs strissinât tal pretori di Pilât.

**1 e 2 a ripetin:**

Popul gno,...

**Cantôrs:**

Jo ti ai sostentât intal desert cu la mane:  
e tu tu mi âs pestât cun patafs e scoreadis.

**1 e 2 a ripetin:**

Popul gno,...

**Cantôrs:**

Jo o ai distudade la tô sêt cu l'aghe de salvece saltade fûr de crete:  
e tu tu âs distudade la mê sêt cun fêl e asêt.

**1 e 2 a ripetin:**

Popul gno,...

**Cantôrs:**

Jo par amôr to o ai pestât i rês dai Cananeus:  
e tu tu âs pestât il gno cjâf cuntune cjane.

**1 e 2 a ripetin:**

Popul gno,...

**Cantôrs:**

Jo ti ai metût in man un baston regâl:  
e tu tu âs metût sul gno cjâf une corone di spinis.

**1 e 2 a ripetin:**

Popul gno,...

**Cantôrs:**

Jo ti ai puartât in alt cun grande fuarce:  
e tu tu mi âs picjât sul patibul de Crôs.

**1 e 2 a ripetin:**

Popul gno,...

**Cjante**

**Ducj:**

**Crôs amade, te foreste mai un arbul fo cjatât**

che par frascje, frint e pome ti passàs in nobiltât.

Dolçs i clauts, o plante dolce, dolç il pês che tu âs puartât!

**Cantôrs:**

Jeve, lenghe, l'alte cjante pe disfide di valôr,  
il trionf puartât, palese, sul trofeu de sante Crôs,  
là che il Redentôr dai umign fo copât e vincidôr.

**Ducj:**

Crôs amade, te foreste mai un arbul fo cjatât  
che par frascje, frint e pome ti passàs in nobiltât.

**Cantôrs:**

Il Creadôr si displaseve che il prin om ch'al fo creât,  
pal ingjan de male pome, te ruvine al fos colât  
e a rimiedi di chê plante veve un altri len prontât.

**Ducj:**

Dolçs i clauts, o plante dolce, dolç il pês che tu âs puartât!

**Cantôrs:**

Chest, l'impresa e domandave da l'umane redenzion:  
che fos l'art divine a vinci l'art dal inimì dal om  
e al nassès culà rimiedi, là che il trist ferive il mont.

**Ducj:**

Crôs amade, te foreste mai un arbul fo cjatât  
che par frascje, frint e pome ti passâs in nobiltât.

**Cantôrs:**

Cuant che duncje il temp di gracie fo in plenece madurât,  
al vignì, de sede eterne, il fatôr dal mont mandât,  
che de Virgjine al nasseve, riviestint l'umane cjar.

**Ducj:**

Dolçs i clauts, o plante dolce, dolç il pês che tu âs puartât!

**Cantôrs:**

Inte grepie, frut, al suste te criure gjenerât,  
cui panzei a lu tapone la sô mari virgjinâl,  
mans e pîts di Diu lis fassis, strenzin ben invuluçâts.

**Ducj:**

Crôs amade, te foreste mai un arbul fo cjatât  
che par frascje, frint e pome ti passâs in nobiltât.

**Cantôrs:**

Sui trent'agns da la sô ete distinade, il Redentôr,  
par sô sielte al acetave la passion e tal dolôr,  
come agnel menât a ufierte fo picjât sul trâf de crôs.

**Ducj:**

Dolçs i clauts, o plante dolce, dolç il pês che tu âs puartât!

**Cantôrs:**

Ve che mare i dan di bevi, tal lancûr che lu disfâs,  
ve che clauts e lance a passin e mil spinis il so cuarp:  
dal so sanc e mår e tiere, cîl e mont a son lavâts.

**Ducj:**

Crôs amade, te foreste mai un arbul fo cjatât  
che par frascje, frint e pome ti passâs in nobiltât.

**Cantôrs:**

Sbasse i rams, gloriose plante, da seont al cuarp tindût,  
e la ruspie tô pendence fale dolce, se tu pûs,  
par arcâ la cjar fruçade, dal Re altissim, cun plui dûl.

**Ducj:**

Dolçs i clauts, o plante dolce, dolç il pês che tu âs puartât!

**Cantôrs:**

Tu bessole, tu puartaris l'unic presit di chest mont:  
arcje che tu prepararis pe salvece un puart al om  
e tal sanc tu ti bagnaris dal Agnel, te sô passion!

**Ducj:**

Crôs amade, te foreste mai un arbul fo cjatât  
che par frascje, frint e pome ti passâs in nobiltât.

Cheste conclusion no si à mai di lassâle fûr:

Ducj:

Infinide sei la glorie a la sante Trinitât:  
come al Pari, al Fi cul Spirit, sedi il stes onôr puartât;  
l'un e terti non di Diu sedi a mai finî laudât. Amen.

Seont l'usance dai lûcs o lis tradizions dal popul e par une oportunitât pastorâl si pues cjantâ Stabat Mater, seont il Graduâl Roman, o un altri cjant adat in memorie de sante Marie Virgjine dolorade.

21. Finide l'adorazion, la Crôs e ven puartade dal diacun o di un ministri sul altâr, tal so puest. I cjandelfrs

impiâts a vegnin metûts di ca e di là o parsore dal altâr o dongje de Crôs.

### TIERCE PART:

#### SACRE COMUNION

22. Sul altâr si slarge une tavae e si met il corporâl e il messâl. Intant il diacun o, se nol è, il predi, metût il vêl omerâl, al puarte il Ss.m Sacrement dal lûc de riposizion al altâr pe strade plui curte, biel che ducj a stan cidins. Doi ministris cui cjandelfrs impiâts a compaggin il Ss.m Sacrement e a poin i cjandelfrs di ca e di là o sul altâr. A pene che il diacun, s'al è, al à metût sul altâr il Ss.m Sacrement e al à distaponade la pisside, il predi si svicine e al fâs la zenuflession al altâr.

23. Il predi, cu lis mans unidis, a vôs alte al dîs:

Daûr di ce che nus à ordenât il Salvadôr e inscuelâts te regule di Diu, o rivìn a dî:

Il predi, slargjadis lis mans, cun ducj i fedêi al va indenant:

**Pari nestri, che tu sês tai cîi,**  
ch'al sedi santificât il to non,  
ch'al vegni il to ream,  
ch'e sedi fate la tô volontât, come in cîl, cussì in tiere.  
Danus vuê il pan che nus covente,  
parinus jù i nestris debits,  
come che nô ur ai parin jù ai nestris debitôrs;  
e no sta molânus te tentazion,  
ma liberinus dal mâl.

24. Il predi al va indenant dibessôl, cu lis mans slargjadis:  
Deliberinus, Signôr, par plasê di ogni sorte di mâi,  
danus ben disponût la pâs tai nestris dîs,  
e cul jutori de tô misericordie  
o sarin simpri libars dal pecjât  
e sigûrs di ogni conturbie,  
biel ch'o spietin la sante sperance  
e l'avent dal nestri Salvadôr Gjesù Crist.

Al unis lis mans.

Il popul al conclût la preiere aclamant:

Parcè che ream, potence e glorie  
a son tiei par simpri.

25. Il predi po, cu lis mans unidis, al dîs sot vôs:

La Comunion cul to Cuarp, Signôr Gjesù Crist,  
che no deventi par me un judizi e une condane:  
ma pal to boncûr mi zovi

par vuardâ e par vuarî l'anime e il cuarp.

26. Po al fâs la zenuflession, al cjape l'ostie, le ten alçade un fregul parsore de pisside e, voltât de bande dal  
popul, al dîs a vôs clare:

Ve l'Agnel di Diu, velu chel ch'al cjape sù i pecjâts dal mont.  
Furtunâts chei ch'a son stâts invidâts a la cene dal Agnel.

**E dutune cul popul al dîs une volte sole:**

Signôr, jo no merti che tu jentris cjase mê,  
ma dîs dome une peraule e la mê anime e sarà vuaride.

27. **E, voltât viers l'altâr, al ejol cun devozion il Cuarp di Crist, disint sot vôs:** Il Cuarp di Crist.

28. **Po al da fûr la Comunion ai fedêi. Intant de Comunion si pues cjantâ il Sal 21 o un altri cjant adat.**

29. **Finît di dâ fûr la Comunion, il diacun o un altri ministri competent al puarte la pisside tal lûc prontât fûr de glesie o, se lis circostancis lu domandin, le ripon tal tabernacul.**

30. **Il predi al dîs Preìn, e, restât cidin par un trat di temp, al dîs la preiere daspò de Comunion:** Diu onipotent e eterni,

che cu la muart e resurezion dal to Crist tu nus âs ricreâts,  
ten vive in nô la vore de tô misericordie,  
par che la partecipazion a chest misteri  
e consacri dute la nestre vite al to servizi.

Par Crist nestri Signôr.

**R. Amen.**

31. **Par cumiatâ la semblee, il diacun o, se nol è, il predi al pues fâ l'invît:** Pleaitsi par cjapâ la benedizion.

**Po il predi, stant viers dal popul e slungjant lis mans sore, al dîs cheste preiere sul popul:**

**Ti prein, Signôr, ch'e vegni jù bondante la tô benedizion**

sun chest popul ch'al à fate memorie de muart di to Fi,  
cu la sperance di resurî ancje lui;  
ch'al vedi il perdon e la consolazion,  
ch'e cressi la fede sante e ch'e sedi plui sigure la redenzie eterne.

Par Crist nestri Signôr.

**R. Amen.**

32. **E ducj, fate la zenuflession denant de Crôs s'int van cidins.**

33. **Daspò de celebrzion, l'altâr al ven dispueât, lassant però sore la crôs cun doi o cuatri ejandelîrs.**

\* \* \*

## Cjants di Vinars sant

Ve chi la crôs sante, *n. 154*;  
Popul gno, ce ti aio fat? *n. 155*;

Crôs amade, *n. 156*;  
O gran Pari di pietât, *n. 157*.  
O muse insanganade, *n. 128*;  
O capo insanguinato, *n. 129*;

**Salm 21:** Diu gno, Diu gno parcè mo mi âstu bandonât, *n. 240*;  
**Salm 30:** Li di te, Signôr, o voi a parâmi, *n. 245*.

**Strade de crôs, *n. 138*;**  
Via crucis, *p. 285*.

**Tal libri Hosanna**, si puedin cjatâ ancjemò altris cjants e salms adats a cheste zornade.

\* \* \*

**Crôs amade, te foreste mai un arbul fo ciatât  
che par frascje, frint e pome ti passàs in nobiltât.**

\* \* \*

*La Sabide sante e je, par antighissime usance, zornade aliturgjiche, cence liturgjie.*

*Spirât su la crôs, Crist, al à bandonât chest mont e si è sprofondât tal ream des tenebris e de muart.  
Come che al dîs il nestri Credo di Aquilee: al è lât jù tes inferis.*

*Zornade misteriose di marum e di polse, di cidin di chest mont e di sperance in Diu. Zornade li che e  
torne a impiâsi la riflession tant cjare ai nestris paris aquileiês e tant dibatude te teologie di vuê: la  
salvece universâl.*

*E cjante la liturgjie bizantine:*

***Tu sê s vignût jù su la tiere  
par salvâ Adam  
ma no vintlu ciatât su la tiere,  
o Signôr,  
tu sê s lât a cirîlu  
fin tes inferis.***

\* \* \*

\* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*

\* *Il cjant dai salms resposoriâi, Ed. Glesie Furlane, 2012.*

\* *50 corâi de cristianât todescje voltâts par furlan, ed. Glesie Furlane, 2016.*

\* *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*

\* *Par domandâ chescj libris scrivêt a [info@glesiefurlane.org](mailto:info@glesiefurlane.org)*